

○ Йўла, пайрем

ШОРЫКЙОЛЫМ ПЫРЛЯ ЭРТАРЫШНА



Шорыкйол пайремыште

Шорыкйол - марий калыкын идалыкым иктешлыше пайремже. 7 январьште Семисола книгагудо пелен марий шўлышан Шорыкйол пайрем гўжлен. Уна-влак толмылан ўстелтўрыш чесым поген ямдылена: команмелнам, пурам, шорыкйол пўкшым, кудалтыме парентгым, нўреп ковыштам да моло кочкышым. Икмынар жап гыч Васлий кува-кугыза-влак, тўрлў чиeman мўчўр-влак да тыгак ялысе икшыве-влак унала толыныт. Уна-влакым мелна терке, пура дене вашлийме. Мўчўр-влак У ийыште у пиалым тыланеныт, суртоза-влак деч идалык мучко могай кидпашам ыштымышт, идалыкым кузе эртарымышт нерген йодыштыныт. А вара суртоза мўчўр-влак деч кинде могай шочмо, кенже могай лайме нерген йодыштын. Шорыкйол пайремышкына Кугу Шорьялын шочшыжо, Семисола кундемын пагалыме еҗже Юрий Захарович Петров Йўшкар-Ола гыч шочмо кундемшыккыже, аваҗын шочмо ялышкыше Шорыкйол пайремым эртараш, ял калык дене вашлияш толын. Юрий Захарович мўчўр-влаклан пўлек шотеш чодыра пўкшым конден, а икшыве-

влаклан - тўрлў модышым, сувенир-влакым. Мўчўр-влакым чодыра пўкш дене сийлымыже годым нунылан "Пўкш гай томан, пенгыде, таза лийза" манын каласен. Ты пайремыште ял шотан Семисола илемын вуйлатышыже Владимир Витальевич Константинов, Семисола ялын пагалыме, лўмлў еҗже Лея Васильевна Иванова да молат лийыныт.

Пайрем касыште книгагудо вуйлатыше Шорыкйол йўла дене палдарен. Толшо уна-влакат шкеныштын кундемысе йўлашт нерген каласкаленыт, икшыве-влак почеламутым ойленыт, туштым туштеныт. Тўшкан погынен, уна мурымат муралтыме, куштымо.

Шорыкйол пайрем годым ял калык, пошкудо-влак ваш пурен лектыт, йўын-кочкыт, мурен-куштен, жапым веселан эртарат. Пеш кугу таум каласыме шуэш калыклан, икшыве-влаклан, уна-шамычлан пагален толмыштлан. Кугешнена марий улмыда дене, огына моҗдо шкенам марий йылмынам, кугезе йўланам.

Алевтина ОГУРЦОВА,
Семисола книгагудым вуйлатыше